



09 SEP, 2025

TNB lancar kempen keselamatan elektrik elak kemalangan di ladang dan sawah

Sinar Harian, Malaysia



TNB lancar kempen keselamatan elektrik elak kemalangan di ladang dan sawah

PARIT - Tenaga Nasional Berhad (TNB) melancarkan Kempen Keselamatan Elektrik menyasarkan pesawit, pesawah dan orang awam bagi menangani isu kemalangan akibat renjatan elektrik di kawasan luar bandar.

Timbalan Menteri Peralihan Tenaga dan Transformasi Air, Akmal Nasrullah Mohd Nasir berkata, inisiatif itu bertujuan meningkatkan kesedaran masyarakat mengenai kaedah selamat bekerja berhampiran talian elektrik.

“Berdasarkan data, sebanyak 81 peratus atau 84 kes kemalangan elektrik orang awam dan haiwan ternakan dari 2021 hingga April 2025 melibatkan infrastruktur TNB, khususnya di kawasan talian elektrik.

“Kebanyakan insiden berpunca daripada aktiviti orang awam berhampiran talian elektrik, contohnya mengait kelapa sawit menggunakan galah panjang,” katanya ketika melancarkan kempen di Dewan Felcra Nasaruddin Belia, Bota, Perak.

Beliau berkata, kempen serupa itu perlu diperluaskan ke setiap negeri agar kumpulan sasaran memahami risiko talian elektrik sekaligus mengurangkan kemalangan.

Turut hadir, Pengarah Negeri Felcra Berhad Perak, M. Zaiful Anuar Zulkifli; Pengarah Bahagian Pengembangan Pekebun Kecil dan Pensijilan Lembaga Minyak Sawit Malaysia, Dr Mohd Hefni Rusly serta



Akmal Nasrullah (lima dari kiri) meninjau kawasan pencawang elektrik pada Kempen Keselamatan Elektrik bersama Pengguna di Bota pada Isnin.

Ketua Pegawai Kawal Selia dan Pengurusan Stakeholder TNB, Datuk Shamsul Ahmad.

Dalam pada itu, Akmal Nasrullah turut menekankan kepentingan *Malaysia Energy Literacy Programme* (MELP) yang dibangunkan TNB sebelum diangkat ke peringkat Kementerian.

Sementara itu, peneroka Felcra, Mohd Yusof Mat Hussain, 64, berkata, pengetahuannya mengenai bahaya elektrik semakin bertambah

selepas menyertai kempen tersebut.

“Kalau ada program seperti ini, peladang perlu hadir untuk mendapat pengetahuan tentang bahaya elektrik agar dapat mengelakkan kemalangan,” katanya.

Seorang penyelia traktor Pertubuhan Peladang Negeri Perak, Mohamad Azmirul Hakimi Azmi, 20, pula berkata, pesawah dan peladang perlu sentiasa waspada ketika bekerja berhampiran talian elektrik. - *Bernama*